

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савет*

**MIŠLJENJE**

**po Zahtjevu Advokatske kancelarije Karanović & Nikolić o obavezi obavještenja o novom kontrolnom članu ili akcionaru privrednog društva**

**Sarajevo**  
**februar, 2013. godine**



Broj: 01-26-7-2-1-I/13  
Sarajevo, 26.02.2013. godine

Na osnovu člana 25. stav (1) tačka f) Zakona o konkurenciji („Službeni glasnik BiH“, br. 48/05, 76/07 i 80/09), a po Zahtjevu za davanje mišljenja Advokatske kancelarije Karanović & Nikolić, Gundulićeva 4, 78 000 Banja Luka, zaprimljenog od strane Konkurencijskog vijeća dana 11.02.2013. godine pod brojem: 01-26-7-2-I/13, Konkurencijsko vijeće, na 53. (pedesettrećoj) sjednici održanoj dana 26. februara 2013. godine, donijelo je

### **MIŠLJENJE**

Advokatska kancelarija Karanović & Nikolić, Gundulićeva 4, 78 000 Banja Luka (u daljem tekstu: Podnosilac zahtjeva), podnio je Konkurencijskom vijeću Zahtjev za davanje mišljenja (u daljem tekstu: Zahtjev), zaprimljen dana 11.02.2013. godine pod brojem 01-26-7-2-I/13.

Podnosilac zahtjeva traži mišljenje od Konkurencijskog vijeća u vezi sa postojanjem obaveze obavještanja Konkurencijskog vijeća o novom kontrolnom članu ili akcionaru privrednog društva u slučaju kada promjena kontrolnog člana ili akcionara ne podrazumjeva prijavu koncentracije, kako je definisano u Zakonu o konkurenciji (u daljem tekstu: Zakon).

Naime, Zakon o privrednim društvima Republike Srpske u članu 360. definiše obavezu novog kontrolnog člana ili akcionara privrednog društva da „ u skladu sa zakonom kojim se uređuje zaštita konkurencije“ o toj promjeni obavijesti između ostalog, Konkurencijsko vijeće.

Nadalje, Podnosilac zahtjeva ističe da s obzirom da Zakon definiše obavezu prijave koncentracije, zanima ga da li je iznad navedena obaveza prema Zakonu o privrednim društvima jednaka obavezi prijave koncentracije kako je ona definisana u Zakonu.

Preciznije, Podnosioca zahtjeva zanima da li novi kontrolni član ili akcionar privrednog društva u Republici Srpskoj ima obavezu ovu promjenu prijaviti Konkurencijskom vijeću i kada promjena ne ispunjava uslove predviđene za prijavu koncentracije.

Uzimajući u obzir da nisu dostavljeni konkretni podaci o privrednim subjektima, Konkurencijsko vijeće u vezi obaveze obavještanja o novom kontrolnom članu ili akcionaru privrednog društva odnosno obavezi prijave koncentracije navodi odredbe Zakona koji se odnose na isto:

- član 12. stav (1) tačka b) Zakona o konkurenciji utvrđuje da se koncentracijom smatra i stjecanje kontrole ili dominantnog uticaja jednog privrednog subjekta nad dijelom/dijelovima drugog privrednog subjekta i to:
  - 1) stjecanjem kupovinom većine dionica ili udjela osnovnog kapitala; ili
  - 2) stjecanjem većine prava glasa; ili
  - 3) na drugi način, u skladu s odredbama zakona koji reguliraju osnivanje privrednih subjekata i njihovo upravljanje;

- član 14. stav (1) Zakona o konkurenciji utvrđuje da obaveza prijave koncentracije postoji ukoliko su ispunjeni uslovi tačke a) i b) Zakona o konkurenciji ukoliko ukupni godišnji prihod svih učesnika koncentracije ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji i ukoliko ukupni godišnji prihodi svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,0%.
- Za privredne subjekte sa sjedištem i prebivalištem u inostranstvu primjenjuje se član 14. stav (1) tačke a) i b) Zakona o konkurenciji, dok se za privredne subjekte sa sjedištem i prebivalištem u Bosni i Hercegovini primjenjuje član 14. stav (1) tačka b) istog Zakona (član 2. Odluke o načinu podnošenja prijave i kriterijima za ocjenu koncentracija privrednih subjekta - „Službeni glasnik BiH“, broj 34/10).
- član 14. stav (3) Zakona o konkurenciji utvrđuje da se u slučaju kad se koncentracija iz člana 12. stav (1) istog Zakona odnosi na spajanje ili pripajanje dijela ili dijelova jednog ili više privrednih subjekta, bez obzira da li ti dijelovi imaju status pravnog lica, pri izračunavanju ukupnog prihoda obračuna samo prihod onih dijelova privrednog subjekta koji su predmet kontrole koncentracije;
- član 14. stav (4) Zakona o konkurenciji utvrđuje da će se dvije ili više koncentracija iz stava (3) člana 14. Zakona o konkurenciji provedene u vremenskom periodu kraćem od 2 (dvije) godine smatrati jednom koncentracijom (više sukcesivnih stjecanja dijelova privrednog subjekta), izvršenom na dan posljednje od ovih koncentracija;
- član 2. stav (2) Zakona o konkurenciji utvrđuje da se kontrolisanim privrednim subjektom smatra privredni subjekt u kojem drugi privredni subjekt, neposredno ili posredno, pravno ili činjenično, odlučujuće utječe na upravljanje, naročito ako:
  - ima više od polovine udjela u osnovnom kapitalu ili dionica;
  - može ostvarivati više od polovine glasačkih prava;
  - ima pravo na postavljanje više od polovine članova uprave, upravnih i nadzornih odbora;
  - na drugi način ima pravo upravljanja poslovanjem kontroliranog privrednog subjekta.

U Zahtjevu nisu dostavljeni konkretni podaci za privredni subjekt – novog kontrolnog člana ili akcionara privrednog društva iz kojih se mogu utvrditi da li privredni subjekt na drugi način (kao što je navedeno u članu 2. stav (2) Zakona o konkurenciji) odlučujuće utječe na upravljanje privrednim subjektom, što se uzima u obzir pri utvrđivanju „povezanog društva“, te slijedom toga u postupku utvrđivanja ukupnog godišnjeg prihoda privrednog subjekta (novog kontrolnog člana ili akcionara privrednog društva).

Privredni subjekti, učesnici koncentracije, su obavezni podnijeti prijavu koncentracije u smislu čl. 12. i 14. Zakona o konkurenciji, u roku od 15 (petnaest) dana od zaključenja sporazuma, objavljivanja javne ponude dionica ili stjecanja kontrole, zavisno od toga šta nastupi ranije.

Rok za prijavu koncentracije za privredni subjekt koji stječe kontrolu na dijelom (dijelovima) drugog privrednog subjekta teče od dana zaključenja pravnog akta iz člana 16. stav (1) Zakona o konkurenciji.

Članom 16. stav (3) Zakona o konkurenciji utvrđuje se da kada kontrolu nad cijelim ili dijelovima jednog ili više privrednih subjekata stječe drugi privredni subjekt, prijavu podnosi privredni subjekt koji stječe kontrolu.

Ovo mišljenje je dato isključivo na osnovu podataka navedenih u Zahtjevu, te ukoliko dati podaci odstupaju od stvarnog činjeničnog stanja ovo mišljenje se ne može primijeniti.

**Predsjednica**

**Gordana Živković**

**Dostaviti:**

- **Podnosiocu zahtjeva**
- **arhiv Konkurencijskog vijeća**